

橋

西

雜

記

葉文潤臣承家學擁書數萬卷有志纂述少以詩名故羣目爲詩人所著有周易異文疏證禮記鄭讀疏證戰國策地名考皆未卒業橋西雜記則隨筆最錄之書涂乙過半然首尾完具中述掌故志舊聞有資考訂致功良勤橋西者丈所居紀文達故宅當京師虎坊橋之西也丈與家大人同官內閣過從親密祖蔭曩曾奉手受教己庚之間丈改官赴浙膺疾遽實聞者憊傷乃不及十年藏書散盡遺箸淪諸廢紙已刻詩編亦不知歸何所此記幸得自棄擲之餘爰爲校正字句刻以存之撫今懷昔感何能已同治十年六月吳潘祖蔭

橋西雜記

漢陽葉名澧

男子入學

宋趙氏與時賓退錄今世男子初入學多用五歲或七歲蓋俗有男忌雙女忌隻之說以至笄冠皆然案北齊書李渾弟繪傳年六歲便自願入學家人以偶年俗忌約而弗許伺其伯姊筆牘之間而輒竊用未幾遂逼急就章內外異之則其來久矣

地名當遵功令

劉氏靖片刻餘閒集金陵明之留都宗廟社稷臣工咸

在是以有南京之稱 國朝定鼎燕山改爲江甯府乃
江南列郡何得復以京名無如俗口相沿未能變易直
隸天津衛改爲府治設附郭縣已久而仍呼爲衛且省
文曰衛裏甚至士大夫亦習焉不察凡此雖似無關重
輕實則有違功令不可不急爲更正也

葉氏藏書之祖

嘉定鎮江志卷二十一蘇丞相頌家藏書萬卷祕閣所
傳居多頌自維揚拜中太一宮使歸鄉里是時葉夢得
爲丹徒尉頗許其假借傳寫夢得每對士大夫言親炙
之幸其所傳遂爲葉氏藏書之祖

又卷十七葉夢得
崇甯間丹徒尉

儒林外史

坊間所刊小說儒林外史五十卷窮極文士情態全椒吳敬梓所著也字敏軒一字文木乾隆間人嘗以博學鴻詞薦不赴襲父祖業甚富素不習治生性復豪上遇貧卽施借文士輩往還飲酒歌呼窮日夜不數年而產盡醉中輒誦樊川人生直合揚州死之句後竟如所言程魚門吏部晉芳爲作傳

列朝詩傳

顧黃公先生景星言列朝詩諸傳爲虞山生平純粹以精之作闡幽提隱功更不細當絳雲樓火時親見有緋

衣者指麾烈燄上乃大叫曰天能燒我屋內書不能燒我腹內書吾當再爲筆之指其所撰國史也後乃作列朝詩諸傳至選詩多出程孟陽之手

見耳
提錄

塔

唐釋元應一切經音義卷五佛塔注或云塔婆或云偷婆此云方墳亦言廟一義也經文從革作鞞橐亦防捍也鞞非此義卷六寶塔注或云大聚或云聚相謂累石等高以爲相也塔字諸書所無惟葛洪字苑云塔佛堂也孫氏星術莊氏斡皆以古無塔字借鞞爲之塔爲後人所造名澧案鞞通作鞞淮南兵略注鞞鼓鞞聲玉篇

引字書塔物聲是借用之證信爲後人所造說文新附塔浮屠也廣韻入聲二十八盍塔浮圖當爲塔字本義其本字當作刹一切經音義卷六金刹注西域別無旛竿卽於塔覆鉢柱頭懸旛經言塔者應說畧也元應習見俗用塔字不知刹之卽塔因別有金刹之名遂疑爲訛畧誤矣說文新附刹柱也與柱頭懸旛之說相合晉書五行志義熙九年正月大風白馬寺浮圖刹柱折壞此刹字始見於史者唐高僧傳唐僧會吳赤烏十年丁卯至建鄴孫權使人求舍利子旣得之權乃造塔藏之南史虞愿傳明帝以故宅起湘宮更在白馬寺以前矣寺費極奢侈以孝武帝莊嚴刹七層帝欲起十層不可

立分爲兩利各五層白帖云莊嚴差別名之爲利西域以柱表利示以居處也然則以柱表利西域之制後在中華則累石爲之其本字之當作利益無疑矣

利字始見于晉書字亦非古說文踏跋也跋進足有所擷取也當爲字義所本

拆字

拆字術起于宋時亦謂之相字金元氏好問續夷堅志古無相字法宋末有相字能知休咎試之頗驗考宋何氏遠春渚紀聞卷二謝石拆字一條謝石潤夫成都人宣和閒至京師以相字言人禍福求相者但隨意書一

字卽就其字離拆而言無不奇中名聞九重葉氏紹餘
四朝聞見錄卷一亦云楊王沂中閒游郊外遇相字者
是當時多精此術者

前定數

內閣大庫中向存子平若干箱曰前定數庫鑰爲典籍
廳所掌辛亥春予偕某啟鑰往視僅存數十冊篇頁零
亂玩其紙墨明人所爲一老隸在旁云三十年前某相
國取其大半去矣聞山右稷山縣庫亦藏有寫本大都
已往驗而未來之事多不足憑

塞上六歌

常熟徐蘭字芬若一字芝仙康熙中王師北征曾從
出塞賦詩一卷漁洋山人稱其精悍雄拔似供奉嘉州
卷末附塞上集唐六歌各爲序打鬼云番僧最尊者
爲呼必辣吉能悟前身人稱之曰胡圖克土華言再來
人也次朝爾吉次勺煞次喇木占巴次噶卜處次溫則
忒次德穆齊次合楊次合絲規次合唎爾次班第次合
由巴次戡由巴次骨捻爾次顛馬女僧爲尺巴甘赤石
室家者男爲吳巴什女爲吳巴三氣總名之曰喇嘛打
鬼者梵言都勻是日佛殿上燃燈千盞建大旗於殿四
隅旗繪四天王象戡由巴鳴金傳執事者齊集設胡圖

克土座於殿之東朝爾吉以下俱列坐一僧名茶勃勒

氣散淨水於眾僧掌中無常職班第爲之八上陳胡朗

叭令

以醍醐拌麵作人獸形蓋鬼食也

二甲士左右立以帛束口恐人

氣觸之鬼不食也班第扮二小鬼對舞以夜叉睨其旁

向內一呼卽潛入人叢中撒麵以迷人目殿內吹銅凍

西番樂器骨爲之見芝仙出塞集

諸樂隨之以奏合嚟爾十二人戴假

面扮馬哈喇佛備極殊怪雙雙跳舞而出其一曰厄利

汗文殊化身二曰作嘛知文殊之護法神三曰嘛哈噶

喇四曰喇嘛皆觀音化身五曰戒叉叭喇六曰滋那噠

喳七曰著基阿拉喳八曰冬琨著煞九曰生合冬凍十

日出孫冬東十一日煞拉瓦十二日摸黑皆觀音之護
法神也惟厄利汗煞拉瓦爲牛鹿扮面餘皆不可辨合
楞十人扮十地菩薩錦衣花帽繼之而出手執腦骨椀
枯骸棒叉杆綵縷等物旁立番僧數百人持鼓與鈸
鼓鈸之徐急隨其跳舞之節奏赤甘巴出吳巴什夫婦
執香環繞盪則忒宜開經偈衆僧朗誦祕密神呪吽聲
如雨鈴聲如雨喇木占巴以胡朗叭令擲於地於是牛
鹿二假面持刀砍地作殺鬼狀復有一僧曰乃沖戎裝
執戟吐火吞刀云神附於身觀者皆膜拜奉單巾於神
以問休咎跳舞畢合由巴以糖一鉢候於戶抹衆僧之

口而佛事終焉譯者曰烏斯藏有碉房爲邪祟所據白
晝擾人飲食喇嘛乃扮假鬼於房中飲食以誘其鬼因
扮諸佛排闥以入而打之故名之曰打鬼今京師番僧
寺上元除夕亦爲之蓋猶周禮帥百隸以時儼之意也
蒙古棋云局縱橫九綫六十四罌棋各十六枚入卒二
車二馬二象一礮一將別以朱墨將居中之右礮居中
之左上於將一罌車馬象左右列卒橫於前此差同乎
中國者也其棋形而不字將刻塔崇象教也象刻駝或
熊迤北無象也多卒人衆以爲強也無士不尙儒生也
棋不列於線而列於罌置罌于安也馬橫行六罌駝橫

行九卦以駝疾於馬也滿局可行無河爲界所爲隨水草以爲畜牧也卒直行一卦至底斜角食敵之在前者去而復返用同於車嘉有功也衆棋還擊一塔無路可出始爲敗北考象戲始于周武帝司馬溫公損益其法爲古局象棋圖蒙古此戲其仿中國或以意創爲皆不可知然國人爲之亦遂有工拙之不同焉彈喀赤哈云喀赤哈者羊膝髑骨也骨分四面有稜起如雲者爲兒珍背爲鬼兒俯者爲背兒仰者爲梢爲此戲者各記一骨爲馬兒以二骨卜地分甲乙珍先于鬼背先于梢甲以骨若干對拋于地珍鬼背梢從其類以彈之間有

鑿立者愁必負因其類之難得也中則取若彈此而擊
彼則前之所取皆罰出不中乙檢餘骨復拋而彈終計
所得之多寡爲勝負馬兒爲人得去倍其數以贖採珠
云龍珠在頷蛇珠在口魚珠在目鮫珠在皮鼈珠在足
皆不及蚌珠之在腹者其用普嶺南珠色紅西洋珠色
白北海珠色微青皆不及東珠之色如淡金者其品貴
東珠產遼之松花江源出天池熬荒萬里人迹罕至是
水皆有蚌是蚌皆有珠入旗舊有採珠人削木爲舟溽
暑入江以一木插中流沒如沈鼈出如輕鳧與魚龍並
游而不相害額設將軍都統以監之珠八分以上者充

貢次歸其主細碎者禁勿取歲終以勤惰高下其賞罪人免死者發烏喇差遣或以助此役初學者以長繩繫腰入水取蚌急則振繩挈之而起既而習于水勇于洄轉相傳授習以爲常邊植柳爲界有軼出者怪鳥鳴喚其前邏者踪跡之卽得無一人亡者而川澤之利其用遍于天下矣打貂云遼東之山皆產貂貂穴空樹中日伏夜出捕食蟲物土人以時取之秋冬之交入夜隕霜封樹風搖樹巔墮地如積雪貂行霜上跡可數也土人張毳幙以幙爲居畜三犬一守一逐獸一打貂其打貂者名跟蹤跟蹤云跟貂霜上之蹤者也土人視跟蹤所

前得其樹樹多孔塞之留上下上張網下薰以煙貂畏
煙緣木而上入網就獲矣又曰貂食鳥雀飽則宿樹杪
跳枝竄葉疾如奔電間以木弩射得之採葎云遼東產
葎之地有二近者鷹額口遠者江獺江鷹額在盛京東
三百里產葎少江獺在甯古塔東北去盛京可五千里
產葎多故人皆舍近而趨遠歲於春三月裹糧行秋七
月至其地至則伐木列柵推一人爲長曰山頭眾隨其
所之期盡一峰而返人皆以布囊蒙首留二目如面具
左手然朽木以驅蠓蠚右手持銳木以禦虎豹披荆棘
犯風雨而求之雖山崩水溢勿顧也夜歸柵中葎或蒸

或煮貫以線炙乾之聽怪獸之聲遶柵而號巖谷震動
間失道暮宿樹杪嚼蓐以代食強弱不敵多爲人所劫
害霜降以後草木黃落無從辨其根蓐採蓐之人于是
乎歸蓐之性背陽向陰喜卑溼地雖草長至尺而苗必
高出其上其根遇鐵則爛其苗隔歲一苗未苗者名啞
蓐如花之歇枝也然採之者有幸有不幸焉或終日不
獲一或舉一而遇百或數十步外望之有光或以足踐
之而不見其形三椏五葉相對而生一莖獨上而有七
節開花如蓍結子如豆由青而黃而紅有異雀黑色而
小羣飛啄食之蓐子非從雀腹中過墮地則不甲坼其

叢生樹下雖物性使然亦雀矢所遺者多耳序詞詳贍足備志牒詩亦荒怪奇詭無襲積之痕篇長不錄

影

宋人都城紀勝

題曰灌圃耐得翁撰專記杭州故事

凡影戲京師人初以

素紙雕鏤後用彩色褻皮爲之其話本與講史書者頗同大抵真假相半公忠者正貌姦邪者醜貌蓋亦寓褒貶于世俗之眼也此書序作於端平乙未宋理宗二年也是南宋時卽有此戲矣他如相撲卽角傀儡講史演公案打筋斗踏蹺弄椀弄毬諸技言之亦詳

漆沙硯

漆沙硯以揚州盧葵生家所製爲最精顧澗蕢廣圻爲
作記其祖映之嘗於南城外市中得一硯上有宋宣和
內府製六字形質類澄泥而絕輕入水不沈甚異之後
知其爲漆沙所成授工仿造克適於用葵生世其傳一
時業此者遂衆凡文房諸事無不以漆沙爲之製造既
良雕刻山水花鳥金石之文悉臻妍巧

鄉姪

朱鄧氏肅柝欄文集上龜山先生楊博士書自稱鄉姪
鄧某

蘇子卿墓木南夜

陝西韓城縣西北五里蘇山有子卿墓柏數百株咸南向明崇禎間左忠貞公懋第宰是邑拜於墓下而新其祠垣噫精氣所結格及草木厯千百年不泯焉不獨岳忠武墳之著異於時也

勸善書

宋晁氏公武郡齋讀書志小說類勸善書六卷周明寂元豐中纂道釋神奇禍福之效前人所傳記者成一編以誠世拾遺十五卷疑亦明寂所纂又考宋葉留字景良括蒼人亦有爲政善報十卷採取經史各說以及當時宦蹟功在生民慶留後裔者以成一編意取於官師

相規以爲有位者勸

見阮文達公元華經室外集提要

名禮曩見千古

功名鏡十三卷亦宋人所撰

題曰瑞齋吳大有勉道編

其書以陰德

爲首凡夢卜相命取其功名感應之尤切者附著焉至

明仁孝皇后勸善書二十卷

刊成於永樂三年

尤爲繁富

楊忠武公訓子語

綦江伍燕堂封翁紹會錄藏楊忠武公遇春家書一則
諭大兒國佐云現在川中永北猓夷不靖將來制軍必
然前往邊界督兵剿辦如有此信我舉家大小受恩深
重爾自應告請帶兵跟隨前往爾此時年正強壯正可
操練本事學習見識萬不可賦閒卽如帶兵打仗全在

鼓勵士卒駕馭得宜籌糧散餉時時調劑賞罰公正同
受甘苦方能收攬其心對敵打仗時旋探旋進切不可
大意若能平日恤兵兵亦願將同心協力自然所向無
敵至於打仗之法務在迅速隨機應變不可遲疑爲將
領者首以地利爲重次要眼力照料得準腳跟站立得
定切不可少有畏怯必須身先士卒人人自必奮勇直
前一鼓作氣斷無不制勝之理若一味自恃勇敢敵一
人者也此中機宜要爾審度切不可看奇門及行軍寶
鏡拘定時日坐失事機關係甚重我一生全不講究此
等學術全靠心術專一上可以對天下可以對衆此係

我平生得力之要法未嘗不屢戰而屢勝也要爾領畧諸事謹慎而行方可以仰報 聖恩並可以副我期望之苦心爾亦不枉作將門之子也爾其勉之右所言切中行軍之要公一生戰略具載 國史及族子誠村通侯芳所述中外勤勞錄中

忌辰禁嫁娶

忌辰向不禁嫁娶雍正五年古北口游擊劉繼鼎於

聖祖仁皇帝忌辰婚娶爲提督郭成功所劾革職

治罪今通行時憲書於

列祖

列宗並歷

代

列后忌辰不載宜嫁娶字

世宗憲皇

帝命欽天監詳議後永爲定式定例凡忌辰 皇上
在宮中素服齋居一日而臣庶酬酢慶賀不敬莫大乎
是矣 聖訓煌煌昭垂簡冊第恐窮陬僻邑日久而
漸忘願天下有司廣錄 諭旨宣示鄉閭俾知所遵循
焉

記東園

道光己亥秋日予與黃蓉石刑部玉階結詩會於城南
觀音禪院之東園與斯會者陳雲伯文述家筠潭紹本
兩丈及陳君頌南慶鏞賓主凡五人設伊蒲饌談藝甚
歡聞有詩僧蓮衣寄居於此邀之同坐詢之乃吾邑儒

家子也二十年前與雲丈子小雲裴之相識於揚州蓮衣初不知小雲之既歿也道及小雲當年友朋燕飲之盛及丈令江都諸惠政丈憮然久之嗣是丈往來甚密蓮衣好吟咏嶽僧不相能住持見其交游多冠蓋中人陽示以禮而心實厭之予與雲伯丈諷之曰此地豈可久居乎時丈方以縣令謁選吏部未幾得安嶽之繁昌將欲攜之同行予力爲懇恣慨然諾買舟由潞河南下假道吳門館蓮衣於禪寺屬家香士道芬寫蓮社證因圖寄予以識文字緣焉雲伯丈之繁昌後以事與上官忤幾遭罷斥越三年卒年已七十有三矣蓉石奉諱

歸粵家庭多拂意事筠潭丈以鴻臚致仕流寓江南數
年中先後化去頌南浮沈仕途蹶而復振而蓮衣上人
今亦不知挂錫何方矣予重過東園不勝陳迹之感焉

楊武陵

王氏宏撰山志論明末楊督師嗣昌事極爲允當其言
曰或有舉近世奸相及武陵者雪客偶以問予予曰武
陵可議在奪情一事然亦有可原者當時實出自上意
非武陵之爲之也但既有人言祇當引罪力求去不當
與漳浦對辨上前又不當言及鄭鄭以引上怒而才不
足以濟變又或一時意計之偏則有之固不得謂之賢

相如謂之奸使與烏程宜與同科則冤矣且其不逞欲
贖貨卒以疆場事自盡亦可無憾或曰其自盡也懼法
而死耳予曰懼法而死亦賢者事視彼已賜死而周章
傍徨營求內外以妄冀赦書于半夜者其相去何如耶
漳浦學問品行高耳所謂應變將略亦非所長觀其後
所爲可見若其大節則與日月爭光可也漳浦之節愈
高而武陵之論不得不抑而愈下此武陵之不幸也理
勢所至非人力能爭矣名澧案沅湘者舊集載督師詩
三十餘首讀至歲暮待命蔚州諸作足見當日心事山
史惜其才不足以濟變誠爲定論固不必援引顧天錄

及他書力爲辨白也

元遺山詩注

烏程施北研國祜熟于金源掌故所著金源劄記外有元遺山詩注十四卷詳于時事而略于故實自言舊稿燬于火友人愆思更聚書注解七月而成宜其疎漏也卷首列年譜一卷考遺山年譜大興翁覃溪學士方綱歛凌仲子教授廷堪皆有成書詳略互見合北研而三矣元人閻宏曾有遺山詩注本後聞姚牧菴之言而止見姚文公燧牧菴集閻君墓志銘其時相去未久引據時事當必信而有徵惜其書之不成也

陸放翁詩注

稽氏承咸梁溪書畫徵言其鄉許氏富藏書有許眉岑仲堪者注放翁詩集甚詳惜未板行今其書不知尙存焉否他日當向錫山人詢之眉岑與鮑若洲汀交善乾隆嘉慶間人也

蘇東坡詩補注

宋漳州黃學臯有補注東坡詩王應山閩土記載其目見查氏慎行得樹樓雜鈔今是書未見刻本體例若何抑補施注所未詳耶

吳梅村王漁洋別號

予得歸文休昌世墨竹卷後有吳梅村跋自署大雲居士又王漁洋亦號詩亭逸老見程哲所刻蓉槎蠡說序

沈歸愚選詩

沈歸愚尙書德潛選 本朝人詩義例見存者不錄獨登黃莘田大令任之作莘田鄉人孟瓶菴超然作書與莘田曰歸愚選先生詩固以爲六十年前旗亭傳唱必已超埃壒而游閭闔庸知綠鬢婆娑尙抱膝長吟于烏山白水間也

瞿稼軒論張江陵

明瞿忠宣公式昶在掖垣時上疏有云當神廟初年江

陵柄政凡民生國計吏治邊防事事綜覈件件精明自
大臣以至小臣自內臣以至外臣稟稟救過不遑隕職
是懼雖事嫌刻覈元氣微傷而廊廟邊疆皆有精明強
固之象則以江陵不徇情面惟責成功故至今譚相才
者猶不能不追思之此數語與昔人恩怨盡時方論定
封疆危日見才難同一意也

二語王天庚謁張文忠公
詞句朱竹垞稱爲詩史天

庚名啟茂石首人崇禎末以明經薦不就

左忠貞公死後事

近人刻明左忠貞公懋第集附載年譜言公死後都門
有諸生曹某者素負狂名人莫與之語聞公變撫而哭

之痛歸嚮得白金徒步扶襯歸萊陽張氏爾歧蒿菴間
話則謂先生盡節後兩僕奉其遺燼而南史閣部迎之
淮上命之衰經主喪閣部諸公與之哭弔成禮兩僕一
名羅質一名宋敬兩僕事各家作誌傳均未載考劉澤
菴撰公暨劉淑人墓誌銘金陵既定淑人北旋至鎮江
聞先生殉難之信隱忍問道歸里收餘燼迎先生靈車
還葬蘿石先阡亦不言歸櫬南至淮上之事

順天書院

明首善書院在宣武門內天啟初鄒公元標馮公從吾
所建未幾東林難作遂廢後西洋借地修厯名曰厯局

我朝仍之日時憲局

聖祖御書門額天文歷

法可傳永久入字道光年間西洋人不復來京師無人
居之今其地亦漸就荒圯矣白首善廢七八十年京師
無復立有書院康熙庚辰大京兆錢公晉錫設大興宛
平二義學教士宛平寄宣武門外長椿寺而大興儼屋
於洪莊洪莊者文襄公承疇賜園也在崇文門外金魚
池上嗣是宛平之學并歸大興延王崑繩源主其事從
游日眾京兆欲市莊內隙地構堂文襄孫奕沔不可乃
上疏託言奕沔願割其地以建學

聖祖嘉其請

書廣育羣材額以賜奕沔奕沔聞之大驚而無如何王

崑繩爲之記備敘其經營之始乾隆十五年庚午改名曰金臺書院至今肄業生徒甚眾而籍隸他省者亦附焉

蔡夫人書孝經卷

楷書孝經一卷末題明忠烈文明伯武英殿大學士黃道周妻蔡氏玉卿書於石養山中之齋室凡二十九字不著年月攷黃公我朝定諡忠端具見勝朝殉節諸臣錄忠烈之謚唐王隆武時所贈夫人此卷蓋丙戌後作也年譜孺人林氏侍太夫人來京就養至嘉興病卒天啟三年事六年丙寅先生年四十有二娶夫人蔡氏

許部蔡乾釜姪女據此蔡夫人爲先生再娶或以爲遣

室

南海潘氏聽帆樓書畫記

誤矣譜於夫人事不之及志乘他書多

紀之名潤石玉卿其字也幼讀書知大義十歲能屬文
事母孝母病與其妹刲臂瀹羹以進及歸黃事姑復以
孝著先生廷杖繫獄夫人寓書謂天王明聖不日霽顏
語不及私遣戍復致札云自古忠貞豈煩內顧身後之
事玉卿圖之及先生死乃使長子偕門客之江南得齒
髮歸葬北山墓側流離播越不脫衰絰與子姪言不踰
闕晚卜居龍潭長齋二十載卒年八十三卒之日出所
臨先生書孝經付其子慶曰吾諸孫必有能讀此者尙

其與之詩文不自存所傳者與侯生書題侯太孺人遺
詩二篇而已見洪氏思所作夫人行狀及
萊堂節錄梁谿詩鈔諸書夫人書法端
勁具有隸體視先生雖稍遜然必非俗手所能模範先
生嘗易其名曰孝徽有以也夫

蔡夫人墨竹軸今藏福州梁氏漁洋山人香祖筆記
稱其精繪事嘗作瑤池圖以遺母固不僅書法見長
也嗚呼此特小技耳詎足爲夫人重哉因附記之

藏經音義

唐釋元應一切經音義二十五卷著錄於新唐書藝文
丙部道家類改名衆經音義宋晁氏公武郡齋讀書

志小學類有唐藏經音義四卷未詳撰人分四聲以類相從蜀中印本與元應書體例卷數均不相符新舊書未載其目又高僧傳云唐釋慧琳爲大藏音義一百卷今亦不傳

黃忠端公書孝經冊

明漳浦黃公道周居官以清苦聞天下崇禎庚辰被逮白雲廬下諸獄卒皆不敢有望於公惟日奉紕札丐書時公拷掠備至血肉淋漓日據敗几書孝經以當役錢凡一百二十本皆與獄卒持去

見莊起疇所著年譜及孫承澤庚子銷夏記

此冊舊藏亳州何氏今歸于予題曰第二十九本作於

崇禎辛巳八月據年譜崇禎十四年辛巳公年五十七

前一年庚辰已在請室

集中庚辰長至後五日及除夕詩皆請室中作

辛巳

之臘謫戍辰陽壬午二月始出都作此冊時刑曹尙未定讞也冊首隸書通神明光四海六字庶人章五刑章廣至德章諫諍章及章末皆自書跋語

附錄跋語

庶人章第六 自天子至庶人皆以不毀傷爲始揚名顯親爲終不毀傷其身然後能不毀傷天下人之身揚名顯親然後能錫天下以和順之名立身事親孝之終始無天子庶人一也而天子爲大第十六章

修身慎行恐辱先也原本於此

五刑章第十一 上明五德下明五刑歸於非孝無親聖人豫知後世必有楊墨之亂爲先防如此

廣至德章第十三 仲尼開口說至德要道三千年來人都認作孝字其實只是敬也敬因嚴生嚴絲愛出爲此天性上便有君臣之義所以把享帝假廟之精神都於膝下日嚴處看出所以初言教之所由生也至是又說君子之教以孝也可見孝字只是因性立教的路頭到敬字纔有升堂入室地位無敬做孝不成無孝做教不出看他說此二章語語分明要做

聖賢只就敬處著手

諫諍章第十五 將順愛也諫諍敬也非敬何愛陷不義之禍至於危亡無令名之患甚於毀傷故甯受毀傷之禍不避近名之嫌也

右經十八章 今文一千八百四字 此篇炳如日

星與大學中庸相爲表裏孝爲德之根祗敬爲孝之要歸孟子所稱仁義禮樂之實皆從此出而孟子說不學不慮不如說敬之爲要約也論語一部皆言仁獨此經未言仁所以曾子有聖人之德無以加於孝之問中庸一部書多言孝獨未嘗言諫諍所以曾子

有從父之令得爲孝乎之問有此兩問爲此篇發大
眼目使聖帝明王所以仁天下萬世之心與孝子忠
臣所以救萬世天下至意晃然中天不然後世只說
郊祀配天是報德崇功之極爭臣爭友猶有近名近
刑之嫌如此則素相素臣皆無復七世觀德之事諸
臣媚子久據有明德赦免之長矣此書明明以揚名
二字問導中根以立教二字獎引上路凡聖賢作此
事原本心性與世上聲華織毫無涉到其所以立教
處雖毀傷肢體駮落膚髮猶且爲之賴有曾子兩問
於將順匡救處討出骨肉不然是一味過歲飴糕也

黃忠端書孝經卷 續本

咸豐辛亥人口予與蘇賡堂給諫廷魁同游琉璃廠肆
賈人有新自吳中來者出所得孝經二卷一爲黃忠端
公書一爲蔡夫人書元和毛氏物也 一亭雜記 忠端公
曾著錄

亦有自跋書於辛巳秋仍爲請室中筆墨末後一行崇
禎甲申仲秋望日偶錄石齋白雲庫下書 石齋上
空一字 予諦

觀之後署字不應重出玩其筆勢當是蔡夫人臨本忠
端作於辛巳者夫人至甲申秋復摹錄其副耳洪思作
夫人行狀言卒之日以所臨忠端公孝經授其子蔡堂
節錄 徐氏時
作著 言夫人善臨池代公作行草幾奪眞嘗偕

北上舟中臨衛夫人帖人皆以匹錦售之然皆署公名
晚年乃自署亦不輕予人皆夫人代公作書之證考年
譜崇禎甲申公年六十其時正上疏福王經營鄴山書
舍嗣是朝命敦迫就道而終無還山之期矣卷尾有彭
二林進士紹升所作頌一篇文字古雅余與賡堂反覆
嗟賞久之不忍釋手賡堂勸予購藏亟取白金五十餅
投諸肆取二卷而歸

附錄跋語

大學說本亂末不可治中庸說聲色於化民末也此
章說先王見教之可以化民其所因者本也終言生

民之本盡矣有子孟子所言爲仁守事皆從此出原
本只是看身卽是親親卽是天享祀明堂與立名立
教更無兩義耳

顧亭林輓張稷若詩

盛氏百二抽堂筆談濟陽縣志載有顧亭林聞張稷若
訃一詩集中不載云歷山東望正悽然忽報先生赴九
泉寄去一詩懸劍後貽來十襲絕韋前

原注君有儀禮
句讀十卷錄副

界衡門月冷巢鴛室墓道風枯宿草田從此山東問三
禮康成家法竟誰傳蒿菴卒於康熙丁巳季冬時亭林
在關中此詩蓋作於次年也名禮案近徐星伯丈松張

石州穆編亭林年譜此事失載

憫忠寺僧

京師宣武門外法源寺唐名憫忠遼金時典故最多趙氏翼已考得數事

廿二史劄記卷二十八

偶閱遼僧行均龍龕手

鑑前有統和十五年丁酉七月初一癸亥燕臺憫忠寺沙門智光字法炬序遼時僧人喜講文藝此序亦憫忠寺遺聞也

履歷減年歲

王文簡公士正池北偶談士大夫履歷例減年歲卽同人宴會亦無以真年告人者考宋時卽有真年官年之

說見容齋隨筆

錢氏大昕編王深甯先生年譜先生生於宋甯宗嘉定十六年癸未七月二十九日後八年理宗紹定元年弟應鳳生與先生同陳氏僅重定年譜引宏簡錄道學本傳父撝同日雙生二子應麟應鳳並據先生自作墓誌及先生子昌世所作壙記具載嘉定七月庚午日先生與弟應鳳同日生以正錢氏之誤名禮案寶佑四年同年錄第一甲第九人王應鳳下注年二十七以年歲計之應鳳實少先生八歲當卽錢氏所本然不如墓誌壙記更爲可信也錄中不書眞年亦當時競用官年之證

端四日

名禮以五月初四日生因別號爲端四生後閱朱氏載
鷗弄屑集鴻臚高少卿五月初四日生其子折簡招友
箋尾署端四日人皆笑之攷歲時記五月一日至五日
皆可稱端宋文信國公生於五月二日其生朝詩有客
中端二日之句見指南錄

小年

文信國公指南錄二十四日詩注小年夜詩云春節前
三日江鄉正小年作此詩在祥興二年己卯其年以十
二月二十六日立春也此風始於宋時禁中大中祥符

元年以是日爲降聖節

聖祖是日降延恩殿見宋史禮志

至乾道時爲

小節夜民間謂之交年

見乾道歲時記

前明沿其俗宣府鎮志

是日北人謂之交年是也

行

輦行之行有平去聲兩讀胡氏鳴玉訂譌雜錄云近時一名流將丈人行誤押陽韻名禮案丈人行宋陸游詩客來都避席謂我丈人行也押入陽韻不自胡氏所見者始儀禮喪服傳鄭注婦人嫁於父行則爲母行嫁於子行則爲婦行陸德明釋文行戶郎反漢書匈奴列傳漢天子我丈人行也顏師古注行胡浪反唐人已行兩

讀杜甫詩十五男兒志三千弟子行從平聲讀也又豈如吾甥不流宕丞相中郎丈人行王孫丈人行垂老見飄零及杜牧詩再拜宜同丈人行過庭交分有無同從去聲讀也

書鋪

宋趙氏升朝野類要卷五凡舉子預試並仕宦到部參堂應該節次文書並有書鋪承幹書鋪之名始見於此
內閣官制

今制大學士滿漢各二人正一品兼殿閣殿三日 保和 文華 武英閣三日 體仁 文淵 東閣協辦

大學士滿漢各一人俱從尙書本衙內閣學士兼禮部
侍郎滿六人漢四人從二品食三品俸侍讀學士滿四
人蒙古漢人各二人從四品侍讀滿十人漢二人蒙古
漢軍各二人食正六品俸五品頂帶典籍滿漢漢軍各
二人正七品中書滿七十人蒙古十六人漢軍八人漢
三十人貼寫滿四十人蒙古六人從七品

謹考會典詞林典故及王氏正功中書典故彙紀諸書
國初設文館於盛京天聰十年三月改建內三院
曰內國史院內秘書院內宏文院順治元年三月增設
三院學士各一員二年三月定爲正二品衙門四月令

翰林官由內院補授閏六月裁翰林院以歸內三院定
內三院大學士二員爲二品學士四員爲三品六年正
月更定內院官制三院各設學士一員十年六月增設
三院漢大學士各二員十五年七月裁內三院改三院
大學士爲殿閣大學士十八年六月裁內閣翰林院復
設內三院七月設內三院滿漢大學士各一員滿學士
各二員漢軍漢學士各一員康熙八年七月裁三院滿
學士各一員九年八月復改內三院爲內閣十月改三
院大學士學士銜加殿閣大學士兼尙書學士兼禮部
侍郎另設翰林院

翰林院於順治時歸併內院康熙九年仍復其初其時大學士仍兼各部尚書銜蓋自順治初年以來員缺無定出自簡在康熙雍正間漢大學士三人以存內三院之舊雍正七年授禮部尚書陳元龍左都御史尹秦爲額外大學士卽今之協辦也大學士以殿閣稱者殿四閣二有 中和殿大學士乾隆十三年定爲滿漢各二員協辦滿漢或一員或二員殿銜不列 中和而增體仁閣之名爲殿銜三閣銜三

順治五年定內三院滿洲大學士爲一品漢大學士以五品兼漢尚書爲二品十五年改殿閣名滿洲大學士

一品漢大學士仍以五品兼銜爲二品康熙九年定滿

漢大學士俱正二品兼尙書銜

其時尙書亦二品

雍正七年升

大學士爲正一品尙書爲從一品乾隆五十八年上

諭大學士職居正一品毋庸兼從一品銜

順治十五年設學士侍讀學士侍讀等員 中和 保

和 文華 武英殿學士各二人 文淵 東閣學士

各二人以禮部侍郎兼之十六年留殿閣大學士裁殿

閣學士及侍讀學士各員現任者以原官留任缺出不

補滿侍讀學士以下改中書仍照品級兼卿寺銜典籍

中書照舊置設康熙九年學士仍以禮部侍郎兼殿閣

銜十年罷兼銜稱內閣學士兼禮部侍郎定設滿學士
四人漢軍學士二人漢學士二人十二年漢軍漢人併
爲漢缺共四人滿字侍讀學士二人滿漢字侍讀學士
二人蒙古侍讀學士二人漢軍侍讀學士二人乾隆十
七年改漢軍爲漢缺以漢軍漢人並用學士秩三品雍
正十三年侍郎升正二品學士如侍郎品級侍讀學士
秩五品升四品而侍讀亦升五品給六品俸

今侍讀學士滿洲蒙古漢人共八員侍讀共十四員滿
本堂侍讀學士二員侍讀四員無漢人漢本堂侍讀學
士滿二員漢二員侍讀滿三員漢軍二員蒙古堂蒙古

侍讀學士侍讀各二員滿票簽滿侍讀三員漢票簽漢
侍讀二員初康熙十年設滿字侍讀四人滿漢字侍讀
四人十六年增三人三十八年裁減尋復增二人凡滿
侍讀十人蒙古漢軍各二員如舊其漢侍讀二員則雍
正四年設也今侍讀學士列京堂惟考試試差仍與典
籍中書及翰詹科道六部各官同試侍讀缺出由典籍
中書內揀選引 見補用

典籍本正八品漢缺以中書俸深者由吏部題選乾隆
二年閣臣奏改正七品漢中書缺三十二乾隆十三年
裁二缺雍正十一年翰林院添設起居注主事一員缺

出中書內揀選二人引見候用其後典籍與焉雍正元年宗人府設漢主事二員缺出則以進士出身之典籍中書及國子監監丞博士助教一併揀選

內閣飯銀

雍正六年令各省督撫藩司每歲各出銀百兩爲內閣侍讀學士等官飯銀而不及學士十年山海關進羨餘三千兩給內閣官員學士與焉而不及大學士乾隆十四年撥戶部銀庫平餘銀及鹽關各差二十五處每年計一萬有奇而大學士學士一體受賜其餘各官以數遞減閣中本匣紙墨之需仰給於此下至供事阜役紙

匠亦得沾溉焉今飯銀庫滿洲侍讀二人掌之歷年各
省積欠未解交者爲數甚夥物力盈絀固有今昔之殊
矣

書賈

宋錢唐陳思著寶刻叢編以記所見金石文字臨安陳
起喜與文士交刻六十二家詩爲江湖小集明隆萬間
童珮子鳴有詩六卷皆書賈之少知文藝者

禁白蓮佛事

沈氏濤瑟榭叢談元史英宗紀至治二年閏五月癸卯
禁白蓮佛事白蓮佛卽今所謂白蓮教也

內閣掌故宜有專書

六部院寺皆有則例越數年或十年重加增定然宏綱鉅目大清會典一書已括其大指則例特其繁文耳官書之外私家著述如黃氏叔瓚之南臺舊聞江氏口口之太常紀要援古證今瞭如指掌亦居是官者所不可廢內閣職掌絲綸地居

禁近向無專書其職守非如六部院寺之委曲繁重可以分任于胥史也大而朝章國典細而軼聞逸事將聽其放失乎名禮昔讀山陽阮氏葵生茶餘客話自序直票簽百餘口中粗繙外記一遇夜直攜長蠟三枝竟夕

披覽不倦史歲典籍百數十年之章疏積若崇山隨意
抽閱如獲至寶心嚮往之及名禮以道光癸卯入直內
閣欲搜羅掌故勒爲一書以阮氏之言詢諸閣中前輩
則先于道光初直廬不戒于火舊時案牘蕩然無餘悵
悵久之暇時因雜輯羣籍中自唐迄明省名官制建置
沿革手鈔已成尺許將命名曰中書舊事考友人以仁
和王氏正功中書典故彙紀八卷見示反復披閱凡有
涉中書靡不甄錄間加考證可謂詳而且賅視名禮倍
之因盡乘其稿焉又於上海錢氏指海中得葉氏鳳毛
內閣小志一冊首志其地次志其官次志其職事次志

其儀文末志其姓氏亦復簡而有法惟卷末附故事二十餘則援引疏畧不如王氏遠甚然二書皆成於乾隆三十年乙酉至今又數十年儀文規制不無損益顧名禮備官閣下隘於聞見不能續三先生未竟之緒不可愧歎

漢票簽不戒於火道光二年壬午十月二十四日事直宿者鮑君庚也

內閣設漢侍讀

雍正四年設漢侍讀二員張正瓊沈青崖二君

其名始未詳始

爲此官後皆出爲巡道由中書舍人升刑部主事仍爲

舍人升侍讀者則有畢君誼

江蘇松江人康熙戊戌進士

由侍讀爲

御史仍留票簽者則有陸君尹耀具見葉氏內閣小志

內閣初設官

曹氏仁虎宰輔拜罷小志內閣初設有承政參政理事
官副理事官又考取舉人生員入內院辦事攷順治十
八年籍紳冊無承政等官未知何時所設尋復裁減理事
官副理事官六部五城通政司大理明時中書有兼司
寺皆有之見順治十八年籍紳冊經局正字者二員 國朝因之後止設一員乾隆三十
六年吏部奏裁此缺

絲綸簿

今內閣進本擬簽經 御定後學士照簽批紅於本
面原寫進簽仍交漢票簽收存直班中書記於檔冊曰

絲綸簿其制亦本於前明王文恪公整震澤長語累朝
絲綸簿具存內閣復辟記朝廷旨意多出內閣條進稿
留閣中號絲綸簿是也然今中書職掌不同前明絲綸
簿之名則仍其舊耳

內閣規制職掌

內閣古中書省也定制於明永樂初 國朝基址一如
其舊在午門內東南隅門西向入門西爲滿本堂掌校
寫清字本祝板印篆及 皇史宬大庫之收藏東爲漢
本堂掌收發通本 各省督撫提鎮學院本由
通政司達於閣曰通本 繙清文兩
堂之間北有一門入門有堂三間爲大學士直舍堂上

懸調和元氣四字額乾隆九年

十月初一日

御書賜

內閣者楣間懸乾隆十八年

六月初六日

嘉慶五年

十一月十八日

道光二十二年

三月十三日

三十年

十二月十二日

上諭凡四道

又嘉慶十八年

七月

御製勤政殿記墨刻

臣鐵保敬書

二十年

四月二十七日

御製內閣箴

清漢書

堂外懸機密

重地一應官員不許擅入違者治罪不饒

亦清漢書刻金字順

治十一年

五月二十四日

聖旨也屋皆覆黃瓦堂垣之東西

向者漢票簽處校閱各部院本票擬繕寫簽記絲綸簿

擬撰進奉文字收存軍機處發交事件後南向滿票簽

處又後小屋滿檔房校閱清字本繕清字簽與其檔案

傳知各衙門鈔錄事件事件自軍機處領出有奏摺奉

旨者漢中書司之奏摺未發交或特降旨者滿中

書司之值園班者同

園班滿中書每值五日漢中書每值二日以次遞換

滿

票簽西垣外日稽察房

員無定

凡諭旨票簽處傳鈔後按

日記檔月終彙奏職司簡甚票簽處每日進本簽經

欽定

旨下滿漢學士照簽批紅本面

大學士標示論只用墨筆

所以避尊也

假稽察房爲批本之地又北東向日飯銀庫南

向日典籍廳定例部院及各職司皆有鑄印大學士無

印惟廳有關防掌文移統屬吏役有大典禮請用御

寶滿侍讀兼攝其事廳分南北爲二廳之外往北屋覆

黃瓦曰蒙古堂繙繹外藩諸部文字課俄羅斯學生此閣以內之規制與其職掌也由滿票簽處北去則閣之後門後門之東紅牆一帶爲大庫門二典籍廳滿本堂分掌其鎖鑰存貯 列聖實錄批紅副本厯代帝

王功臣畫象書籍 誥勅房在午門內之東廊管理者無定員滿漢本堂侍讀二人充提調官初各官請 封典漢中書撰文擬進寫軸頒發乾隆中彭文勤公元瑞奏請撰定滿漢京外文武各官 誥勅文不必隨時具草後遂爲例雍正七年青海用兵以內閣在 太和門外事慮洩露設軍需房於 隆宗門內選中書之敏慎

者爲章京後其地改名軍機處實爲內閣之分局沿至乾隆末章京不必盡出身中書而六部理藩院司員亦充是選矣

叢書

古無輯錄各家著述爲叢書者唐陸氏龜蒙有笠澤叢書叢書二字始見於此然仍詩文專集也宋溫陵曾慥集穆天子傳以下二百五十種爲類說是則後世叢書所出昉後陶氏宗儀刻說郛所錄不下千餘種卷帙雖云縻富然任意芟削頗失原書之真讀者病之有明一代如川公秘笈之類多蹈此習毛氏晉津逮秘書成於

崇禎之季校勘精善遠過前人 本朝二百餘年收藏

之家多喜輯刊叢書凡人間罕見之本無不廣爲搜採

桐鄉顧氏修曾輯宋元以來叢書目錄刻十冊而我

朝尤爲驟富

其書成於嘉慶年間迄今數十
年刊本不下百種可補輯也

稽古者得

以按冊而購藏之矣至如歛鮑氏廷博當

仁宗

朝以知不足齋叢書進

御褒題詩章

恩賜舉

人尤藝林之盛事也

避孔子諱

趙氏翼陔餘叢考金史明昌中詔周公孔子名俱令回
避又詔有司如進士名有犯孔子諱者避之著如今此

近代避聖諱之始錢氏大昕養新錄則云大觀四年避孔子諱改瑕邱縣爲瑕縣龔邱縣爲龔縣名澧案瑕縣龔縣宋史地理志屬龔慶府魯郡本兗州皆大觀四年所改以其地近聖人之居耳他如京畿雍邱封邱之屬均未避改也我朝申令極嚴雍正三年奉上諭孔子聖諱理應迴避令九卿會議九卿議以凡係姓氏俱加卩爲邱字凡係地名皆更易他名書寫常用則從古體卩字議上 上諭朕細思今文出於古文若改用卩字是未嘗迴避也此字本有期音查毛詩古文作期音甚多嗣後除四書五經外凡遇此字並加卩爲邱地名亦

不改易但加卞旁讀作期音庶乎允協足副尊崇 先
師至聖之意

順天鄉試同考官

順治二年定例鄉試房考京闈用中行及候選進士如
不足取在外推知到京送察院候順天府伴行入 朝
同主考監臨等官 陸辭入院五年題准聽禮部會用
吏部選用十七年除郎中不差外吏部取各部員外郎
主事中行誥博國子監科甲出身之員及近京推知先
取進士出身者不足兼取舉人出身康熙二十六年專
用直隸科甲出身知縣乾隆二十一年停止改用京堂

趙甌北汪龍莊考史之法

趙氏翼成廿二史劄記三十六卷自言不能研究經學
惟歷代史書事顯而義淺便於流覽爰取爲日課有所
得輒劄記別紙有裨乘脞說與正事岐誤者不敢遽詫
爲得聞之奇修史時此等記載無不蒐入史局棄而不
取必有難以徵信之處今反據以駁正史不免貽譏有
識錢氏大昕謂此論古特識顏師古以後未有能見及
此者同時汪氏輝祖治元史專以本史參證不更旁引
他書區以三類曰證誤曰證遺曰證名二君於學皆能
實事求是可爲考史之法矣蓋歷代修史未必出於一

人之手前後踳駁固可就本書以正其說而裨官野史
當日登諸史館秉筆者或持一己之私見以爲定評或
有所避忌而不敢直言三國以後比比然矣自予視之
讀史者自當奉正史爲主正史而外不妨兼及別史折
衷於一是凡支離謬誕之談概從刪削焉裴松之之注
三國志亦卽此意而惜其決擇之未精也

兵部請進天下輿圖

順治十二年七月兵部奏凡天下險隘要衝地方職方
司皆有圖籍而邊事特重故鎮戍總圖九邊圖以及沿
海腹裏並夷蠻獠獍宜備禦者著於圖說疆域之或險

或易兵馬之宜增宜減一覽瞭然今時勢既殊圖籍應
易請 敕下各直省督撫將所轄境內水陸衝區及險
隘形勢繪爲二圖仍錄明季設置兵將幾何今改設幾
何詳注圖旁謹攷乾隆六十年以前中外臣工所進圖
式今存輿圖房隸造辨處

師傅保銜

國朝滿漢大臣自順治迄道光朝贈太師銜者佟勤襄
公圖賴 滿洲鑲黃旗人兵部承政授定南將軍 佟忠烈公養正 滿洲鑲黃旗人遊擊
世 滿洲正藍旗人乾隆壬戌進 贈太師銜者
聯 奉文勤公寬 滿洲正藍旗人乾隆壬戌進 贈太師銜者
贈太師銜者顧文端公八代 滿洲鑲黃旗人禮部尙書 加太師銜者

洪文襄公承疇

漢軍鑲黃旗人
兵部尚書
經略五省軍務

兼大學士
范文肅公文

程

漢軍鑲黃旗
大學士

金文通公之俊

江南吳江縣
大學士

鄂文端公

爾泰

滿洲鑲藍旗人
大學士兼兵部尚書

曹文正公振

鏞

安徽歙縣人
乾隆辛丑進士
大學士總理工部事務

長文襄公齡

滿洲正白旗
大學士

等威勇公總
理戶部事務

阮文達公元

江蘇儀徵縣人
乾隆己酉進士
大學士總理兵部事務

潘文恭公世恩

江蘇吳縣人
乾隆癸丑進士
大學士總理戶部事務

贈太傅銜者

謝清義公陞

山東德州人
大學士

黃文僖公棧

浙江錢塘縣人
順治丁亥進士
大學士

士兼吏部尚書

佟忠烈公國綱

勤襄公長子
內大臣授安北將軍

佟端

純公國維

勤襄公次子
內大臣兼議政大臣

王文恭公頊齡

江蘇華亭人
康熙

丙辰進士
大學士

徐文定公元夢

滿洲正白旗人
康熙癸丑進士
大學士掌院學士

張

文端公英

安徽桐城縣人康熙

朱文端公軾

江西高安縣人康熙

甲戌進士大學士兼吏部尚書

劉文正公統勳

山東諸城縣人雍正

錢

文端公陳羣

浙江嘉興縣人康熙進士刑部侍郎加尚書

蔡文恭公新建

福建

漳浦縣人乾隆丙辰進士大學士

朱文正公珪

順天大興縣人乾隆戊辰進士大學士掌院學

士加太保贈太傅者馬文穆公齊

滿洲鑲黃旗人大學士兼戶部尚書董

文恭公誥

浙江富陽縣人乾隆癸未進士大學士

加太保銜者馮銓

順天涿州

人明萬曆癸丑進士大學士兼禮部尚書

張文和公廷玉

文端公子康熙庚辰進士大學

士兼吏部尚書議

福文端公敏

滿洲襄白旗人康熙丁丑進士大學士兼工部

政大臣傅文忠公恆

滿洲鑲黃旗人大學士兼慶文恪

公桂

尹文端公子大學士兼領侍衛內大臣

贈太保銜者希文簡公福洲

正黃旗人大學士兼議政大臣孟忠毅公喬芳漢軍鑲紅旗人川陝黃

忠恪公梧福建平和縣人史文靖公貽直江蘇溧陽縣人康熙庚辰

進士大學士兼吏部尚書梁文莊公詩正浙江錢唐縣人大學士來

文端公保滿洲正白旗人大學士兆文襄公惠滿洲正黃旗人協辦

大學士刑部尚書尹文端公繼善滿洲鑲黃旗人雍正舒文襄

公赫德徐文定公孫大學士阿文成公桂滿洲正藍旗人大

加少師銜者車文端公克滿洲鑲白旗人大學士衛文清公

周祚山西曲沃縣人大學士贈少師銜者吳順恪公六奇廣東

豐潤縣人饒平鎮張襄壯公勇陝西咸陽縣人雲南提

總兵加左都督張襄壯公勇督加左都督靖逆將軍

靖逆

侯加少保贈少師銜者巴敏壯公哈納滿洲鑲白旗人大學士郎

統加少傅銜者額文恪公色黑滿洲鑲藍旗人大學士兼戶部尚書贈少

傅銜者王文靖公熙順天宛平縣人順治丁亥進士大學士兼禮部尚書徐文穆

公本浙江錢塘縣人大學士加少保贈少傅銜者石忠勇公廷柱

漢軍正白旗人京口鎮海將軍一等伯加少保銜者王文通公永吉江蘇高郵州人

州人都察院左副都御史額勤良公爾克代青滿洲正黃旗人甯文

毅公完我漢軍正紅旗人大學士兼議政大臣蔣文端公赫德漢軍鑲白旗人

士兼禮部尚書李文勤公蔚直隸高陽縣人順治丙戌進士大學士兼戶部尚書贈少保

銜者王文安公鐸河南孟津縣人禮部尚書高文端公爾儼直隸靜海縣人

大學士劉明靖公武元漢軍鑲紅旗人南贛巡撫宋文康公權河南商邱縣人

大學士李忠襄公率奉漢軍正藍旗人浙閩總督圖文襄公海滿洲正黃旗人

大學士兼吏部尚書都統議
政大臣撫遠大將軍三等公

黃忠端公降生事

明黃忠端公道周初字螭若父青原公名嘉卿母陳氏
妊娠之夕青原公夢金甲金斧擁神人而至故忠端續
騷中有始龍夢彼乾精嵌鏐鎔其若鎧之語龍爲父稱
也莊氏起儔編年譜所述如此陳鼎荔枝譜及福建通
志言其家圃中有赤石長數丈大數圍母夫人夢石墜
而生先生因號石齋後石旁生荔枝一株閱十年而實
有翰墨香忠端領鄉薦擢南宮登翰林結實倍列節後
樹亦枯其事與年譜異

拜年

明陸氏容菽園雜記京師元日後上至朝官下至庶人往來交錯道路者連日謂之拜年如東西長安街朝官居住最多至此者不問識與不識望門投刺有不下馬或不至其門令人投刺據此拜年始於前明而此風至今踵行已久至所云有閉門不納者今則無之然亦不獨京師爲然凡通都大邑窮鄉僻壤無不冠裳角逐相率爲懽者偶閱文衡山集中有詩云不求見面惟通謁名刺朝來滿敝廬吾亦隨人投數紙世情嫌簡不嫌虛可發一噱

讀書法

宋史儒林傳何基凡所讀無不加標點義顯意明有不待論說而自見者

明陸氏容菽園雜記陳元孚讀書法生則慢讀吟語句熟則疾讀貪遍數攀聯以續其斷喝怒以正其誤未熟切忌背誦既倦不如少住如此力少功多乃是讀書要務

張氏爾岐蒿庵閒話葉奕繩嘗言強記之法某性甚鈍每讀一書遇所喜卽劄錄之錄訖朗誦十餘遍粘之壁間每日必十餘段少亦六七段捲卷閒步卽就壁間觀

所粘錄日三五次以爲常務期精熟一字不遺壁既滿乃取第一日所粘者收笥中俟再讀有所錄補粘其處隨收隨補歲無曠日一年之內約得三千段數年之後腹笥漸滿每見務爲汎濫者略得影響而止稍經時日便成枵腹不如予之約取而實得也

壹貳叁肆等字

壹貳叁肆伍陸柒捌玖拾阡陌等字陸容菽園雜記謂始于明初刑部尙書開濟而宋邊實崑山志已有之考石刻隋龍藏寺碑勸獎州內士庶壹万人等唐開元寺貞和尚塔銘書開元貳拾陸年元和華岳廟題名壹月

貳拾陸日又云元和拾伍年壹月尉遲恭碑粟米壹阡伍伯石蓋不自宋始後世官書以此等字爲關防所以免他人改易也至如秦漢碑惟一二三書法不同則篆隸之體偶然耳

顧氏炎武金石文字記舊唐書睿宗紀先天二年三月癸巳詔制勅表狀書奏牋牒年月等數作一十二三十四十字知前此皆借壹貳等字不知其始于何年左氏暄曰唐法琬碑建于中宗景龍三年稱左衛翊壹府翊衛彭城劉欽且書考唐書百官志翊衛之府二曰翊一府翊二府碑書一作壹足爲前此公牒借用壹貳等

字之證

見三餘
偶筆

迴避

趙氏翼陔餘叢考引通考唐開元二十四年設別頭試
爲後世科場迴避親族之始考宋史張士遜傳科場初
用糊名法士遜爲巡捕官以進士有姻黨請迴避自是
有親嫌者皆迴避著爲令是宋時迴避仍承唐制也宋
史選舉志舊制秋貢春試皆置別頭場以待舉人之避
親者自總麻以上親及大功以上婚姻之家皆牒送惟
臨軒親試謂之天子門生雖父兄爲考官亦不避是避
親者就試別院及赴廷對雖考官不避也選舉志又云

嘉定元年命朝官有親屬赴廷對者免差充考校十二年禁假託宗枝遷就服制者然考夷堅志汪義和預鄉薦淳熙辛丑其弟義端爲文院檢點試卷官牒詣別頭乃奏名以黃甲榜登第寶祐四年同年錄王應麟爲覆考檢點試卷官其弟應鳳名列一甲第九人當亦試別院者而錄未之詳又與嘉定時免差充考校之言不合或淳熙以後改復舊制有親屬赴廷試仍不避與

札

姜西溟編修宸英嘗著淇園札記闔百詩徵君乙之改札記爲劄記西溟引爾雅郭注春秋左氏傳孔疏皆有

簡札之文劄子古人用以奏事注疏家未嘗及之不從
閻徵君說其自序如此名澧案劄字不見於說文說文
札牒也又牒札也互相爲訓古時簡札用木爲之史記
孟子荀卿列傳注以牒爲械索隱牒者小木札也而漢
書路溫舒傳載以爲牒注小簡曰牒與爾雅釋器簡謂
之畢注義相通說文簡牒也札內則鄭注簡所
書篇數也札牒簡三字義通釋名釋
書契札櫛也編之如櫛齒相比也然則後人隨筆記錄
當用札爲是閻徵君以劄記名書並欲乙改澧園札記
過矣劄廣韻以鍼刺也用以奏事唐以後書始見之

鄉會同年會

宋趙氏升朝野類要卷五諸處士同鄉曲并同路者其在朝及三學相聚作會曰鄉會若同榜及第聚會則曰同年會此卽今同鄉同年團拜所昉

宋紹興十八年同年錄

錄載紹興十七年三月二十四日御筆手詔十八年四月初三日御試策各一道二月十二日鑠院勅差知貢舉一人同知貢舉二人參詳官八人點檢試卷官二十人二月十八日十九日二十日引試詩賦論策三場二十二日二十三日二十四日引試經義論策三場別試考試官一人點檢試卷官四人三月二十三日引試御

試勅差初考官三人覆考官三人詳定官三人徧排官
二人初考覆考檢點試卷官各一人續承指揮添差到
對讀畢充初覆考同共考校六人四月十七日皇帝御
集英殿唱名賜狀元王佐以下及第出身同出身三百
三十人釋褐當月十八日赴期集所糾彈三人牋表五
人主管題名小錄九人掌儀典客各二人掌計掌器掌
膳掌酒果各一人監門二人四月二十六日依令賜錢
一千七百貫二十九日朝謝五月初二日就法慧寺拜
黃甲敘同年初五日赴國子監謁謝先聖先師兗國公
鄒國公立題名石刻于禮部貢院賜狀元王佐等聞喜

宴于禮部貢院

第一甲十人第二甲十九人第三甲三十七人第四甲一百二十二人第五甲一百四十二人特奏名一人朱子名列第五甲第九十人是錄以朱子存也初奏第一甲董德元居首陳孺次之王佐又次之佐爲吏部員外郎時與秦檜子熺不合見陸放翁所撰墓誌

渭南文集

五甲

第一百四十二人徐履本貫溫州瑞安縣時秦檜欲妻以女因陽狂延對不答一字乃附五甲末時人爲之語曰殿榜若還顛倒挂徐履依前作狀元事載附錄世罕

知之

宋趙氏升朝野類要卷二歲謂第五甲末爲殿榜狀元

宗室十六人無一人名登史傳其宋史有傳者朱子外蕭燧尤表二人而已表後於甯宗慶元間與楊萬里薦蔡元定徵之不起蔡乃坐黨禁以死讒人高張賢士無名殊失高宗造士之苦心矣高宗試進士於南省戒飭有司毋以絺綌章句爲工當以淵源學問爲尙事關教化有益治體毋以切直爲嫌其事在紹興五年後復申禁程文全用本朝人文集或歌頌及佛書全句則刻此錄之前一年事並見選舉志

寶祐四年同年錄

此錄體例與紹興十八年錄微異卷首載寶祐四年五

月八日御試策題一道勅差詳定官三人編排官二人
初考官三人添差初考官覆考官各三人添差覆考官
四人初考檢點試卷官覆考檢點試卷官各一人對讀
官七人巡捕官二人五月二十四日皇帝御集英殿唱
名賜進士文天祥以下及第出身同出身共六百一人
當日赴期集所六月一日準勅依格賜進士期集錢一
千二百貫文小錄錢五百貫文六月七日謝闕六月十
三謁謝先聖先師兗國公鄒國公六月二十九賜聞喜
宴同日降賜御詩於禮部貢院七月一日准省劄爲期
集所支用不敷再降題名小錄錢一千七百貫文七月

四日拜黃甲同日敘同年於禮部貢院七月二十五日
立題名碑石於禮部貢院卷末載文信公廷對策策尾
考官王應麟奏曰是卷古誼若龜鑑忠肝如鐵石臣敢
爲得人賀賜詩一首文信公恭謝詩一首己未門謝表
一篇

第一甲二十一人第二甲四十人第三甲七十九人第
四甲二百四十八人第五甲二百一十三人每甲第一
日第一名第二以下則曰第幾人治詩賦易書春秋周
禮儀禮皆注於姓名之下名禮案此卽諸科之設據史
志宋初已然不必因紹興十八年錄中未載而疑爲條

例之後增也

宋時本有迴避之例是年王應麟爲覆試檢校官其弟

應鳳乃以一甲第九人及第

說見迴避條下

錄又載文天祥字

宋瑞小名雲孫小字從龍年二十名禮考黃滔所作文

公傳云年二十寶祐乙卯舉進士明年對策集英殿是

丙辰年已二十一刻是錄仍舉進士之年也

文信公死於至元十

九年壬午年四十七生於溫祐六年丙午登科時年正二十一

傳又云長而字之曰天

祥舉進士以字行改字履善

字履善亦見宋史本傳今錄未之載

劉岳申

所作傳言廷對寘第五而宋史儒林王應麟傳則云以

第七卷寘首選

陳氏僅編深甯年譜同陳氏所據者紹明浚儀王氏家乘鈔本也未知孰是

與十八年錄尙附列董德元陳孺王佐三人原寘名次

此錄則未之及矣又如注通鑑之胡身之亦是科所舉

進士

見通鑑序

今檢第五甲第一百二十一人胡三省字景

參小名蒲蓀小字子持年二十七不言字身之第四甲

黃震字東發無小名小字年四十四卽著日鈔百卷者

名列儒林傳世但知此錄以文公及謝陸二公而存也

二甲第一名謝枋得字君直小名鍾小字君和年三十

一二甲第二十七人陸秀夫字君實無小名小字年十九

山長

五代時蔣維東隱居衡岳受業者稱爲山長此隱居而

有山長之名也元史順帝紀至正三年監察御史成遵

等言用終場下第舉人充學正山長是山長亦所設官

也至順鎮江志卷十七學職中列淮海濂溪茅山三書院山長姓名是文宗以前已有山長之職自明

以來由上官聘請乾隆三十年十一月初八日奉 上

諭各省書院延師訓課向有山長之稱名義殊為未協

既曰書院則主講席者自應稱為院長著於各省督撫

奏事之便傳諭知之

明刻房書始於萬厯癸未

慈溪鄭氏梁厯科詩義序後附選義十則其一云嘉隆

以前時文號為極盛然未嘗有坊刻流行自萬厯癸未

馮具區爲房考刻書一房得士錄至戊戌而十八房俱刻於王房仲閔藝隨錄出而遷家漸盛云云雲谷臥錄則謂始於萬曆二十年壬辰鉤元錄不知十一年癸未已有得士錄之刻萬曆以前則未之見也

柳耆卿墓

漁洋山人真州絕句注柳耆卿墓在城西仙人掌真州今儀徵縣也後人求柳墓不可得及閩宋人

失名

東南紀

聞云耆卿死葬襄陽縣之花山遠近之人每於清明日

多載酒肴飲於耆卿墓側謂之弔柳會

曾氏敏行獨醒雜志同

棗

陽今爲襄陽府治湖北通志不載棗陽有柳墓亦無所

謂花山者宋王氏象之輿地紀勝丹陽府卷七有花山
注東山亦名花山元至順鎮江志卷七引潤州類集花
山在州東北今城東有花山寺可證是潤州確有地名
花山者當卽柳墓所在漁洋云在真州仙人掌不知何
據東南紀聞之棗陽則丹陽之誤耳

查

文移中用查字張氏爾岐蒿菴閒話崇禎間文字忌避
頗繁始改用察疑是親王諱考查字羣書中無訓爲稽
察者未知起于何時

准

宋人

失名

愛日齋叢鈔引干祿字書廣韻注准爲準之俗

體石林燕語野客叢書甕牖閒評項氏家說二老堂雜
誌諸書言宋時用准爲準避蔡京父及寇萊公諱而改
郭忠恕佩觿則謂字林用准爲平準之準始于唐呂忱
考唐石刻中孔宣公碑奉先寺像龕記會善寺戒壇牒
溫彥博碑皆書作准是當時用俗體之證又後漢書樊
準傳唐章懷太子賢注準或作准然漢桐柏廟碑已有
准則大聖之文則不獨唐時爲然也石林燕語謂京師
舊有平準務蔡京爲相改平貨務是當時實有此禁令
朝野無敢不奉行之矣大抵宋以前官府文字間用俗

體

愛日齋叢鈔云予見唐書已作准

及蔡京爲相復借俗體爲避諱用

耳

宋趙氏升朝野類要卷五宰相擢用仕宦謂之陶鑄者取造化之義而因留相家諱鑄遂易爲陶鑄據此

宋時避朝臣家諱甚重不僅一准字也

俞理初丈正燮癸巳存稿謂劉宋時順帝諱準昇明中避準爲准未知本于何書

腰站

查氏慎行得樹樓雜鈔腰頓二字見于宋趙彥衛御纂行程記卽今驛遞之腰站

湖廣省分闈鄉試

雍正元年癸卯御史呂謙恆奏湖南士子赴省試洞庭

險猛宜分設兩闈奉 上諭湖南士子赴湖北鄉試必
經由洞庭湖湖水浩瀚無涯波濤不測六七月間風浪
尤險間有覆溺之患朕心深爲惻然或至士子畏避險
遠裹足不前尤非朕廣育人材之意今欲于湖南地方
建立試院每科另簡考官俾士子就近入場永無阻隔
之虞共遂觀光之願 諭下遵行至次年甲辰科補行
癸卯正科鄉試遂分兩闈焉是科湖北考官翰林院侍
講德齡滿洲鑲黃旗人康
熙乙丑科進士工科給事中蔡仕
謙恆字天益河南新
鄉福建同安縣人癸酉科舉人
安縣人忠節公維祺之孫康熙十八年己丑科進士五
十九年庚子科曾主湖廣鄉試後以光祿寺卿致仕

滿洲文鄉會試

王文簡公士正分甘餘話滿洲人准鄉會試自順治九年壬辰科始康熙中停止數科後復舊遂行至今然其例先後不同順治中滿人漢人分二榜至康熙九年庚戌科以後合爲一榜皆試漢文謹考滿洲人赴文鄉試只順天有額其駐防子弟初無在本省鄉試之例嘉慶十八年奉 旨各省駐防官兵子弟准予本省就近考試二十一年丙子科江南浙江湖北福建廣東四川山東山西河南陝甘九省編立旗字號不得過三名取中道光二十三年癸卯科停止各省駐防文鄉試改試繙

釋文

滿洲子弟入學倡於順治辛卯壬辰時范公文程當國
初試百四十人入庠其赴科舉初場止二義

見查氏慎行人海記

此國初之制也

門內繫鈴

宋人

先名

江南餘載陳雍家置大鈴署其旁曰無錢雇僕

客至請挽之今京師居民往往繫長繩于門楣間而綴
鈴于門內復書于門曰某姓拉鈴猶其遺風也

捐館

唐吳達墓志夫人吳氏捐館於里第名禮案捐館二字

本史記蘇秦傳

雪菴書韓文公山石詩

名禮得楷書韓文公山石詩長幘末畧至元丙戌秋八

月上弦雪菴

無印文

考雪庵李姓名溥光早年爲僧後蓄

髮授官曾刻有萬安茶榜王弇州跋稱其書法道勁略

具顏柳及眉山豫章結法又著雪庵字要一卷錢遵王

曾曾見之著錄於讀書敏求記謂能掉襟勒式傳陳宏

道之教取永字八法變化爲二十四法

讀書敏求記又云字要序作於

至大元年菊月望日自署圓悟慈慧禪師資善大夫昭
文館大學士李溥光雪菴張秋塘校云雪菴字元暉大
同人少爲頭陀號雪庵和尚大德中詔蓄髮授昭文館
大學士名禮所藏敏求記乃黃蕘圃主事丕烈評校本

張秋塘校語亦蕘圖
書於書之上方者
觀此慎始知弁州之言不誣而字
要所述書法宗旨必詳惜不可得而見也

修補門牙

明陸氏容菽園雜記吏部門前粘壁有修補門牙法梁
氏玉繩臂記云今市肆有補齒一云鑲齒如生蓋宋以
來有之樓攻媿贈種牙陳安上文陳生術妙天下凡齒
之有疾者易之以新纔一舉手使人保終身編貝之美
陸放翁晚歲幽興詩染鬚種齒笑人癡自注近聞有以
補種墮齒爲業者

手印

梁氏玉繩曾記元姚牧菴浙西廉訪副使潘公澤神道碑凡人鬻人皆畫男女左右食指橫理於券爲信以其疏密判人長短壯少與獄辭同蓋卽今手印而驗法頗異

書賈稱道人

陳思寶刻叢編前序有陳思道人之語張氏金吾愛曰精廬藏書志卷七宋刻釋名殘本四卷前目有臨安府陳道人書籍鋪刊行計十一字

戴表元題孫過庭書讚後云往時杭州陳道人

家印書書之疑處率以己意改令諧順殆是書之一厄

是書賈有道人稱

袁清容論朱陸之學

元袁氏桷清容居士集龔霆松四書朱陸會同序其略曰曩朱文公承絕學之傳其書敘疑非西京於孝經則刊誤焉詩去其敘易異程氏中庸疑於龜山楊氏程楊朱子本以傳授者也審爲門弟子世固未以病文公也陸文安公生同時仕同朝其辨爭者朋友麗澤之益朱陸書牘具在不百餘年異黨之說興深文巧闢爲陸學者不勝其謗淳祐中番禺湯中氏合朱陸之說至其猶子端明文清公漢益闡同之足以補兩家之未備當寶慶紹定間黃公幹爲朱子門人不敢以先人所傳爲別錄黃旣死夸多務廣有語錄焉有語類焉望塵承風相

與刻梓而二家矛盾大行於南北矣

謝皋羽

趙氏翼陔餘叢考嘗怪宋史忠義傳從文天祥勤王者十九人而無謝翱又據宋濂集有翱傳福建長溪人後徙浦城文丞相開府延平署諮事參軍已而別去則未嘗無其人名豐案元袁桷清容居士集師友淵源錄載其名曰謝翱南劍人僧圓志瑞州人俱能古文尙嚴簡氣鬱不自舒困死南劍州宋屬福建路語甚略清容蓋有所諱而然歟圓志當亦宋室遺老毀家爲僧者清容以之與皋羽同稱可想見之矣

金黑白號姓

周氏春遼金元姓譜載金黑白號姓金源廣平隴西三郡爲白號彭城郡爲黑號本於金史百官志又云完顏漢姓譯爲王譯爲漢姓當日屢詔申禁恐其混於漢也其說無可攷名濫案元姚文公燧牧庵集布色君神道碑金有天下諸部各以居地爲姓章廟病其書以華言爲文敕有司定著而一之凡百姓金源郡三十有八廣平郡三十皆白書隴西郡二十有八彭城郡十有六皆黑書其等而別者甚嚴布色氏於金源次居五據此隴西入於黑號與百官志異而各姓之次第亦無他書可

以互證布色

百官志作僕散
今譯改布薩

爲金源郡第五則又與志

相合

邸報

閻氏若璩潛邸劄記邸報二字見唐人詩話韓翃除駕
部郎中事名禮案二字見於史者宋史曹輔傳政和後
帝多微行民間未及知蔡京謝表有輕車小輦七賜臨
幸語自是邸報聞四方汪應辰文定集與李運使書墾
田之議頃於邸報中見之又蘇東坡句坐觀邸報談狂
叟更以之入詩是宋時卽承用之矣及觀孫可之集雜
著有讀開元雜報一篇意當時之邸報歟

書手

書手之名始于唐明陶氏宗儀輟耕錄世稱鄉胥爲書手唐臨報應記宗衍應昭經舉元和初至河陰縣因病廢業爲監院書手姜氏宸英湛園札記則引唐語林駱駿度支司書手而不及唐臨報應記殆未見輟耕錄也

太平翁翁

宋趙氏與時賓退錄紹興間禁中呼秦太師曰太平翁翁見陸放翁詩注

楊倞是唐穆宗時人

新唐書藝文志丙部儒家類楊倞注荀子二十卷注汝

士子大理評事錢氏大昕考異以世系表汝士子有知

遠知溫知止

汝士傳
作知至

三人而無倬名爲疑汪氏中述學

據古刻叢鈔馬公墓志銘楊倬撰志載會昌四年倬當

爲武宗時人郝氏懿行謂此楊倬當別爲一人

荀子補
注附錄

名灋案古刻叢鈔所載結銜

朝請大夫使持節汾州諸
軍事守汾州刺史楊倬撰

與新志不合又爲武宗時其別爲一人審矣惟唐會要

有長慶三年大理司直楊倬詳正勅格之語官名相似

當卽其人舊書汝士本傳長慶元年爲右補闕然則汝

士及倬居官皆在穆宗時也

錠

金史食貨志舊例銀每錠五十兩

施氏國祚金源割記引宣和錄靖康元年

金人需犒軍金百萬錠銀千萬錠每錠各五十兩齊東野語紹興歲幣歲前三日先齋銀百錠字皆作錠

是稱銀曰錠之始至元時乃改用錠字

元史禮志末銀三錠部陽傳銀

一錠字皆作錠

考字書中無訓錠爲銀者其字初用作定唐書

呂用之給楊行密曰用之有銀五萬定克城之日用備

磨下一醉之資然字亦不古不如錠字之義尙可通也

說文錠銅鐵樸也此錠字本義遼僧行均龍龕手鑑錠金銀屬則後世訓解而錠字下亦不訓爲銀錢氏

大昕養新錄元時行鈔法以一貫爲定後移其名於銀

又加金旁說似可信不知唐書中已有書作定者矣

爾雅釋器斲劂謂之定郭注鋤屬陸德明釋文定本作

鏡二字唐時已通用然其義與銀無涉

理寒石

明末理寒石名鬯和河南西華人崇禎壬子舉人本姓李恥與闖賊同易以理講學得白沙姚江之派學者宗之蘇門孫徵君奇逢與西華左令書稱爲魯仲連後一人而王阮亭作蘇門三賢卽引徵君言爲定論當福王在江南時屬烈皇忌日馬士英將游郊垌以遂春風舞雩之樂寒石作書止之馬無以答陳鼎東林列傳言其與賀仲軾友

字景瞻
獲嘉人

亂後航海而死或以爲虔州城將

陷寒石度不能濟墜死於城下

韓程愈
所作傳

特奏

宋趙氏升朝野類要文武舉正特奏名皆爲及第出身
名灋案紹興十八年同年錄附董德元登第詩有故鄉
若問登科事便是當年老榜官厲氏鶚宋詩紀事卷四十七
引曾氏敏行獨醒雜志廬陵俗詔特奏名謂之老榜

郎中待詔博士

顧氏炎武日知錄

卷二

北人謂醫生爲大夫南人謂之

郎中鑷工爲待詔木工金工石工之屬皆爲司務其名
起於宋時名灋案宋洪氏邁夷堅志趙珪本上官彥成
之隸粗得醫術人稱趙三郎中郎中二字始見於此至

鑷工爲待詔明黃省曾吳風錄張士誠走卒廝養皆授
官爵至今呼椎油作麵傭夫爲博士剗工爲待詔以此
宋周氏密志雅堂雜鈔今之消息者不知起於何時然
藥方千金方自有按摩之術唐時有按摩博士此博士
乃官名與今之稱郎中異

李仁父記事法

宋周氏密志雅堂雜鈔昔者李仁父爲長編作大本樹
十枚每樹作抽替六十枚每替以甲子誌之本年之事
有所闕片紙必歸本匣每匣分月日先後次第井然有
條可爲法也

明初韻書

明太祖諭詞臣曰韻學起於江左殊失正音有獨用當併爲通用者不可枚舉命翰林侍講學士樂韶鳳等重刊定之勒成一十六卷計七十六韻洪武八年三月奏上名曰洪武正韻宋濂爲之序平聲不分上下一東二支三齊四魚五模六皆七灰八真九寒十刪十一先十二蕭十三爻十四歌十五麻十六遮十七陽十八庚十九尤二十侵二十一覃二十二鹽上聲一董二紙三聲四語五姥六解七賄八軫九旱十產十一銑十二篠十三巧十四哿十五馬十六者十七養十八梗十九有二

十寢二十一威二十二琰去聲一送二寘三霽四御五
暮六泰七隊八震九翰十諫十一霰十二嘯十三效十
四箇十五禡十六蔗十七漾十八敬十九宥二十宥二
十一勘二十二豔入聲一屋二質三曷四轄五屑六藥
七陌八緝九合十葉凡例謂七音韻平聲本無上下之
分舊韻以平聲字鯨釐爲二卷蓋因宋景祐間丁度作
集韻始今不從惟以四聲爲正名禮案錢氏曾讀書敏
求記卷一載明初豐城孫吾與韻會定正四卷平聲亦不
分上下別作一公二居三觚四江等二十五韻上聲別
作一礦二矩三古四港等一十五韻去聲別作一貢二

據三固四絳等二十五韻入聲別作一穀二覺三葛四
憂等一十五韻書今不傳觀其分別部居大失唐宋諸
儒之舊好奇立異不可爲訓攷洪武二十三年學士劉
之吾以是書進御上覽而善之更名洪武通韻命刊行
焉見周寶所識小編其時正韻頒行天下已久遵奉者鮮不得
已而用及孫吾與之書則承譌踵謬益甚洪武正韻舛誤甚多四
庫全書提要已詳言之明初韻書之不足取如此

戴簡恪公軼事

戴簡恪公敦元官刑部尙書一日大雪公著雨單手抱
文書步至街衢呼驢車乘之御者不知公爲誰也及至

署隸役呵殿而入公下車去雨罩帽露珊瑚頂御者大驚將棄車而逃公強留與之錢而去都中謂之驢車尙書卒之日鄉人往視之敝衣露肘布衾一襲其儉德爲不可及云

汪尙書軼事

故禮部尙書汪公巽泉守和言動悉遵禮法每食必置菜羹於坐隅以祭先代始爲飲食之人揖然後坐

揖

三十年前見諸先輩賓主相揖舉手必至額及地今此風鄉里間偶一見之曩有一後進見萊陽初公頤園於

廣坐中揖甫及半而止初公荅禮尙未畢也同坐皆斥
新進者禮節之疏慙而謝罪焉

藏書求善本

邵君蕙西居京師購書甚富拳拳於板本鈔法名禮與
之言曰彭文勤公嘗詆讀書敏求記染骨董家氣我輩
讀書當用力於其大者未可蹈此蔽也後閱錢氏曝書
雜記引鄭康成戒子書吾家舊貧不爲父母昆弟所容
康成大儒不應出此語考元刻後漢書康成本傳無不
字與唐史承節所撰鄭公碑合今本作不爲父母昆弟
所容乃傳刻之誤此校書之有功於先賢者名禮始悔

前言之陋蓋讀書不多未可輕生訾議耳

朱子嘗著韓文考異校勘之學宋儒所不廢

欽定天祿琳琅前後編所錄多宋元舊本收藏家印亦
附及焉昭文張氏愛日精廬藏書志亦講求板本是近
時書目中之最佳者名澧嘗見邵蕙西案頭置簡明目
錄一部所見宋元舊刻本叢書本及單行刻本鈔本手
記於各書之下可以備他日校勘之資

壬子二月十二日雨中以新得重刻吳元恭本爾雅中

翁覃溪先生校語

徐星伯丈從
翁本過錄者

手鈔於所著強識錄半

日而畢偶憶李生甫先生跋盧氏抱經堂所校法言云

冷淡生活勝於徵歌選舞多矣嘆爲至言

癸已存稿

俞理初丈於先大父爲年家子嘉慶年間曾館之於家
日從事丹鉛不輟所著書曰米鹽錄凡二冊後歸里道
光元年辛巳舉於鄉屢試禮部不第癸巳春闈王君藻
分校得其卷異之決爲宿學薦而未中撤棘後始知姓
名因丐丈鄉人得徧觀其著述詫爲希有商同人釀金
將付梓丈亟欲歸因劄劄事留都門數月釐正十有五
卷題曰癸巳類稿以是書輯成於癸巳年也未定稿爲
三巨冊曰癸巳存稿丙申丈再來都名禮固欲索存稿

錄藏其副弔之斬錄既畢丈取去而以原本歸名灋焉
眉端行閒隨時增益者不少其標目較米鹽錄已多至
數十倍蓋四十餘年心力所聚可以窺見矣越數年丈
歿適張石州爲靈石楊氏編輯叢書石州舊有存稿副
本更取名灋所藏校訂字畫刻甫竣未印行石州亦歿
今其板片不知流轉何所爲可嘆也

理初丈昔爲孫淵如糧儲星衍撰古天文說二十卷又
爲問經堂孫氏輯緯書皆未刊行彭文勤公元瑞五代
史記補注粗有條例以付劉金門侍郎鳳誥侍郎延理
初丈卒歲之晚年又爲張芥航河督輯續行水金鑑若

千卷著述零種爲他人所借梓不可殫述其精核者則於類稿存稿備載之矣

周益公語

宋周益公必大曰大凡文人才士屈首受書未能多閱天下之義理壯則從事四方志有所分及其老也血氣既衰聰明隨之雖有著述鮮克名家此古今通患也益公此數語實從閱歷得來爲學者不可不知做懼一知半解固於聞見但以文人才士互相誇詡而國家之利病民生之休戚漠然無關於其心宦成身老則惟傍宋儒門戶以掩其不學之陋空腹高心可勝慨哉

章實齋語

章實齋進士序葉鶴塗文集曰自雍正至乾隆初年修詩書春秋三禮明史以次告成三通四庫諸館猶未創議一時學者攻習捨舉子業無以干利祿也於是桐城方氏長洲何氏宜興儲氏金壇王氏淳安方氏會稽徐氏六七人者俱以攻四書爲學者宗仰名重一時而山林枯槁鑿靈繕性專門名家以其性情詣力所極亦有卓然不朽之業而攻取之過至目著述文詞謂之雜作通經服古謂之雜學學士非攻四書文藝則不謂之通人蓋亦一時之風尙已二十年來 天子右文稽古

館閣搜羅文獻大備登用才俊不以其資通儒碩學磊落繼起可謂極盛矣進取之士承望下風亦斐然若有天祿石渠校讎討論之思而向之方王儲何諸家藝業閒有舉及之者輒鄙棄之爲不足道夫萬物之情各有其至苟有得於意之所謂誠然而不爲世俗毀譽所入則學問文章無今無古皆立言者所不廢也

購書敞肆於故紙籠中得葉觀察橋西雜記稿本因悉心撝剔復得周易異文疏證禮記鄭讀疏證戰國策地名考易僅列異文未有論說禮記疏證至檀弓杜黃止中有數葉殘損覓不可得地名考

僅七條又徐壽輝韓林兒事輯每冊僅四五條蓋
欲爲而未果者記中所云強識錄則未見也觀察
與潘伯寅侍郎交在紀羣閒余言之侍郎侍郎素
雜記稿本去爲謀付栞因記其目同治六年九月
會稽趙之謙書